

आकाशवाणी जयपुर-अजमेर  
प्रादेशिक समाचार  
दिनांक 01.09.2024 समय: 18.45 बजे

- प्रदेश मांय आज सूं बीपीएल परिवारां रे साथे राष्ट्रीय खाद्य सुरक्षा योजना रा पात्र पिरवारां ने भी साढे चार सौ रुप्या मांय एलपीजी गैस सिलेंडर मिलनो सरू।
- राज्य मांय आज सूं राष्ट्रीय पोषण माह री सरूआत – एक म्हीने ताई महिलावां अर टाबरां रे पोषण ने बधावो देणे खातिर न्यारी-न्यारी गतिविधियां आयोजित व्हेला।
- 28वां राज्य स्तरीय भामाशाह सम्मान जळसा मांय 157 भामाशाहां रो व्हयो सम्मान।
- प्रदेश मांय आज सूं आगले एक सप्ताह ताई बिरखा री गतिविधियां मांय और बधोतरी होणे रा आसार।

000

प्रदेश मांय आज सूं बीपीएल पिरवारां रे साथे राष्ट्रीय खाद्य सुरक्षा योजना रा पात्र पिरवारां ने भी साढे चार सौ रुप्या मांय एलपीजी गैस सिलेंडर मिलनो शुरु हो गयो है। इण योजना रे तैत प्रधानमंत्री उज्ज्वला योजना रा लाभार्थी पिरवार भी पात्र व्हेला। एक करोड़ 7 लाख सूं बत्ती पात्र पिरवारां ने इण योजना रो फायदो व्हेला। खाद्य अर नागरिक आपूर्ति मंत्री सुमित गोदारा बतायो के योजना रे तैत चुण्योडा पिरवारां ने हर म्हीने अधिकतम एक गैस सिलेण्डर साढे चार सौ रुप्या मांय दियो जावेला। पात्र पिरवारां ने गैस सिलेण्डर री तय रकम जमा करवा र गैस सिलेण्डर प्राप्त करणो व्हेला। इण रे पाछे सब्सिडी रो भुगतान परिवार रे जन आधार सूं लिंक बैंक खाता मांय जमा करा दियो जावेला।

000000

राष्ट्रीय आविष्कार अभियान रे तैत जोधपुर जिले री 29 पीएम श्री स्कूलां मांय पढेसरियां री कानी सूं न्यारा-न्यारा इनोवेशन कर्या जावेला। दो चरणां मांय चालण वाळा इण अभियान रे तैत इण बरस आं स्कूलां मांय गणित अर विज्ञान रा सर्किल भी बणेला। गणित अर विज्ञान रे सारू रचनात्मक दृष्टिकोण विकसित करणे खातिर पेले चरण मांय जिले मांय जिले री 24 अर दूजे चरण मांय पांच पीएम श्री स्कूलां ने चुण्यो गयो है। अभियान रे तैत सालभर न्यारी-न्यारी गतिविधियां राख्यी जावे है। इण मांय पढेसरियां ने देश विदेश रा विशेषज्ञ परामर्श देवे है। इनोवेशन खातिर केन्द्र सरकार री कानी सूं हर स्कूल मांय अलग सूं बजट मंजूर कर्यो गयो है। ध्यानजोग है के राष्ट्रीय आविष्कार अभियान रे तैत बणण वाळा गणित अर विज्ञान रा सर्किल मांय होवण वाळी ज्ञानवर्धक गतिविधियां सूं स्कूल रा पढेसरिया रे साथे शिक्षकां ने फायदो मिलेला।

00000

केंद्रीय उपभोक्ता संरक्षण प्राधिकरण (सीसीपीए) संघ लोक सेवा आयोग सिविल सेवा परीक्षा 2022 रा नतीजा रे बारा मांय झूठा अर भ्रामक विज्ञापन छापणे खातिर शंकर आईएएस अकादमी माथे 5 लाख रुप्या रो जुर्मानो लगायो है। उपभोक्ता कार्य, खाद्य अर सार्वजनिक वितरण मंत्रालय कह्यो है के ओ निर्णय उपभोक्तावां रे अधिकारां री रक्षा अर प्रचार करने अर ओ पक्को करणे खातिर कर्यो गयो है ताकि किणी भी सामान या सेवावां रा बारां मांय कोई गलत या भ्रामक विज्ञापन नहीं कर्यो जावे। मंत्रालय इण बात माथे जोर दियो के ऐ विज्ञापन उपभोक्तावां रे अनुचित व्यापार प्रथावां रे खिलाफ सूचित होणे अर सुरक्षा पाणे रे अधिकार रो उल्लंघन कर्यो है।

00000

केंद्रीय श्रम अर रोजगार मंत्री डॉ. मनसुख मांडविया कह्यो है के सरकार गिग अर प्लेटफार्म श्रमिकां ने सामाजिक सुरक्षा रे दायरा मांय लावण खातिर न्यारी-न्यारी संभावनावां तलाश री है। केंद्रीय मंत्री आज नुवी दिल्ली मांय एक समीक्षा बैठक मांय आ जाणकारी दी। डॉ. मांडविया

कह्यो के सरकार वां ने सामाजिक सुरक्षा मुहैया करणे खातिर व्यापक नीति माथे काम कर री है। गिग श्रमिक बे होवे है जका कम बकत खातिर या परियोजना आधारित काम करे है और एक ही नियोक्ता खातिर काम करणे री बजाय केई नियोक्तावां खातिर काम करे है। डॉ. मांडविया कह्यो के श्रमिकां रा पंजीकरण ई-श्रम पोर्टल रे माध्यम सूं कर्यो जावेला। वणां कह्यो के जकि कंपनियां रे साथे ऐडा श्रमिक काम करे है वां ने प्रोत्साहित कर्यो जावेला।

श्री मांडविया कह्यो के मंत्रालय इण बारा मांय सगळा पक्षा रे साथे मिल र काम कर रियो है।

0000

प्रदेश मांय आज सूं राष्ट्रीय पोषण माह री सरूआत व्हेगी है। इण रे चालता एक म्हीने ताई महिलावां अर टाबरां रे पोषण ने बधावो देणे अर वांणे चौखे स्वास्थ्य री गतिविधियां चालेला। उपमुख्यमंत्री अर महिला एवं बाल विकास मंत्री दिया कुमारी बतायो के प्रधानमंत्री मातृ वन्दना योजना रे तहत दिव्यांग गर्भवती महिलावां ने पहली संतान रे खातिर वर्तमान मांय दी जा रही रकम 6500 रूप्या रे जगे माथे अबे 01 सितंबर सूं बधा र 10 हजार रूप्या करयो गयो है। वणां बतायो के आ योजना महिलावां रे सशक्तिकरण खातिर मजबूत कदम है। ध्यानजोग है के बरस 2018 मांय प्रधानमंत्री नरेन्द्र मोदी राजस्थान रा झुंझुनूं मांय राष्ट्रीय पोषण मिशन री सरूआत करी ही।

00000

28वां राज्य स्तरीय भामाशाह सम्मान जळसो उदयपुर रा मोहन लाल सुखाडिया विश्वविद्यालय सभागार मांय राख्यो गयो। जळसा मांय 157 भामाशाहां ने सम्मानित कर्यो गयो। जळसा मांय बोलता थकां शिक्षा अर पंचायतीराज मंत्री मदन दिलावर कह्यो के राज्य सरकार प्रदेश मांय शैक्षणिक उन्नयन खातिर लगोतार प्रयासरत है। वणां कह्यो के भामाशाहां री कानी सूं दिया जा रह्या सहयोग सूं गुणवत्तायुक्त शिक्षा, स्कूलां मांय सुविधावां रो विस्तार हो रह्यो है। श्री दिलावर बतायो के इण बरस प्रदेश रा स्कूलां मांय 140 करोड़ रूप्या सूं बत्ती री रकम रो सहयोग भामाशाहां सूं मिल्यो है। इण मौके माथे जनजाति क्षेत्रीय विकास मंत्री बाबूलाल खराड़ी, सांसद चुन्नीलाल गरासिया, डॉ मन्नालाल रावत साथे केई जनप्रतिनिधि अर शिक्षा महकमा रा अहलकार मौजूद रिया। जळसा मांय विश्व रिकॉर्ड संस्था रा प्रतिनिधि शिक्षा मंत्री मदन दिलावर ने तीन विश्व रिकॉर्ड रा प्रमाण पत्र सोंप्या। ध्यानजोग है के मुख्यमंत्री वृक्षारोपण अभियान—एक पेड़ मां के नाम रे चालता प्रदेश रा स्कूलां मांय 6 करोड़ सूं बत्ती पौधा लगाया गया। वठीने एक दिन मांय लगे टगे ढाई करोड़ पौधां रो रोपण व्ह्यो हो।

00000

मध्यप्रदेश रा मुख्यमंत्री डॉ. मोहन यादव आज झालावाड जिले रा झालरा पाटन पहुंच्या। वठे प्रदेश रा जल संसाधन मंत्री सुरेश रावत अर स्थानीय लोगां वाणी अगुवानी करी। श्री यादव जैन संत प्रज्ञा सागर जी महाराज री 53वीं जयंती महोत्सव जळसे मांय भेळा व्ह्या। वणां एसटीसी स्कूल प्रांगण मांय आचार्य प्रज्ञा सागर जी महाराज सूं मुलाकात कर आशीर्वाद भी लियो।

0000

राज्यपाल हरिभाऊ किसनराव बागडे कह्यो है के मानव जीवन री रक्षा खातिर रक्तदान अमूल्य है। वणा रक्तदान खातिर निरंतर जागरूकता बढाये जावण री बात माथे जोर देवता थकां कह्यो के रक्तदान रे खातिर लोगां ने प्रेरित कर्यो जाणो चाहिजे। श्री बागडे आज अखिल भारतीय गौशाला सहयोग परिषद री कानी सूं राख्यी ज्या महारक्तदान शिविर रा शुभारंभ रे मौके बोल रिया हा। वणां गौ ऋषि प्रकाशदास जी महाराज री प्रेरणा सूं राख्यी ज्या रक्तदान शिविर ने खास बतायो।

00000

पेरिस पैरालंपिक रे चौथे दिन आज बैडमिंटन मांय भारत रा दो तमगा पक्का व्हे गया है। मनीषा रामदास एसयू-5 वरग मांय महिलावां रे एकल वर्ग मांय सेमीफाइनल मांय जगह बणा ली है। अबे वां रो मुकाबलो आपरे ही देश री टी. मुरुगेशन सूं होवेला। आं दोन्या मांय सूं जो भी खिलाडी फाइनल मांय पहुंचेली, वांको कम सूं कम रजत तमगो तो पक्को हो जावेला। वठीने पराजित होवण वाळी खिलाडी कांस्य तमगे खातिर मैच खेलेली। वठीने पुरुषां रा सिंगल्स एसएल-4

सेमीफाइनल मांय सुकांत कदम रो मुकाबलो आपरे ही देश रे सुहास यतिराज सूं व्हेला। इण मांय भी फाइनल मांय पंहुचण वाळे खिलाडी रो तमगो पक्को व्हे जावेला। फिलहाल पदक तालिका मांय चीन पहले, ग्रेट ब्रिटेन दूजे अर ब्राजील तीजी जगे माथे है। भारत एक सोने रो, एक चांदी अर तीन कांस्य रा तमगा रे साथे 22वीं ठोड माथे है।

000

प्रदेश मांय आज सूं बिरखा री गतिविधियां मांय ओर बधोतरी होणे री आस है। मौसम केन्द्र जयपुर रे मुजब प्रदेश मांय एक नुवो तंत्र बणणे सूं पूर्वी राजस्थान मांय एक सप्ताह ताई भारी बरसात रो दौर जारी रेहणे रा आसार है।

इण रे प्रभाव सूं आज कोटा अर उदयपुर संभाग मांय कठे-कठे भारी बिरखा होणे अर जयपुर, जोधपुर अर अजमेर संभाग रा केई भागां मांय हल्की सूं मध्यम बिरखा रा आसार है। केन्द्र राज्य रा 28 जिला मांय यलो अलर्ट जारी करयो है। राजधानी जयपुर मांय दोपहरा पाछे कई जगाहा माथे हल्की सूं मध्यम बिरखा दर्ज करीज्यी। श्रीगंगानगर जिले रा सूरतगढ खेतर मांय तेज बरसात व्ही। इण बीचे लारला 24 घंटा मांय पूर्वी राजस्थान मांय कठे-कठे अर पश्चिमी राजस्थान मांय कुछ एक ठोडा माथे बिरखा दरज करी ज्यी।

वठीने, भरतपुर मांय व्ही तेज बरसात सूं जिला रा बांध बरेटा रो जल स्तर 28 फीट सूं ऊपर पहुंच गयो है। पाणी री लगातार आवक ने देखता व्हा आज बांध रो एक गेट खोल र पाणी री निकासी करी जा रही है। इणसूं बयाना अर रूपवास खेतर रे बहाव वाळे खेतरां रा गांवां मांय अलर्ट जारी करयो गयो है। विश्व प्रसिद्ध केवलादेव राष्ट्रीय पक्षी उद्यान मांय पांचना बांध सूं आया पाणी सूं पछियां ने चौखो माहौल मिल रहयो है और ब्योरो म्हाणा संवाददाता सूं-

वी.सी. भरतपुर पीटीसी

राजसमंद जिले रा प्रमुख जल स्रोत राजसमंद झील मांय पाणी री आवक लगोतार जारी है। झील रो जलस्तर बध र 17 दशमलव 60 फीट हो गयो है। टोंक जिले रा बीसलपुर बांध मांय भी पाणी री आवक चाल री है। आज दोपहरां बांध रो जल स्तर 314 दशमलव पांच-पांच आरएल मीटर दरज करयो गयो।

0000

जोधपुर सूं दिल्ली रेल यात्रा मांय अब पहले रे मुकाबले कम बगत लागेला। जोधपुर सूं जयपुर होता व्हा दिल्ली रेल मार्ग रो विद्युतिकरण लगेटगे पूरो होणे सूं इण गेले माथे इलेक्ट्रिक रेलों रो संचालन व्हेला, इणसूं जातरियां रो करीब आधा घंटो बचेला। जोधपुर मण्डल मांय एक हजार 626 किलोमीटर रेलमार्ग मांय सूं एक हजार 567 किलोमीटर मारग रो विद्युतिकरण हो चुकयो है।

00000

प्रदेश मांय न्यारी-न्यारी ठोडां माथे गणेश चतुर्थी परब न लेर तैयारियां करी जा री है। सवाईमाधोपुर जिला मांय लागण वाळे त्रिनेत्र गणेश जी रा लक्खी मेळे न लेर प्रशासन तैयारियां शुरू कर दी है।

जिला कलेक्टर मेळे रे चालता कानून अर शांति व्यवस्था बणाये राखणे खातिर मेला मजिस्ट्रेट अर सहायक मेला मजिस्ट्रेटां री नियुक्ति कर दी है। मेळे रो आयोजन 6 सूं 8 सितंबर ताई व्हेला। वठीने गणेश चतुर्थी परब न देखता थकां पाली जिला मांय ईको-फ्रेंडली गणपति री मूर्तियां तैयार करी जा री है। पर्यावरण संरक्षण रे लकस सूं आं मूर्तियां ने इको-फ्रेंडली कलर सूं सजायो जा रहयो है। मूर्तिकारां रो कहणो है के इण बार बाजारां मांय ईको-फ्रेंडली मूर्तियां री मांग बध री है। आं मूर्तियां ने अनंत चतुर्दशी रा दिन घरां मांय गमला मं ही आसानी सूं विसर्जित करयो जा सकेला। इणसूं पर्यावरण रो संरक्षण व्हेला।

0000